

Visoki predstavnik suspendovao odluku o preimenovanju Međunarodnog aerodroma Sarajevo

Visoki predstavnik danas je objavio Odluku o suspendovanju odluke o preimenovanju Međunarodnog aerodroma Sarajevo.

On je rekao da će u narednih deset dana najaviti i novi postupak kojim će se osigurati da svi međunarodni aerodromi u Bosni i Hercegovini mogu biti preimenovani samo nakon opsežnih konsultacija i odobrenja od strane nadležnih institucija na državnom nivou.

U isto vrijeme visoki predstavnik oštro je osudio kao "uvredljivo" pismo koje je član Predsjedništva BiH Borislav Paravac danas uputio visokom predstavniku za zajedničku vanjsku i sigurnosnu politiku i generalnom sekretaru Vijeća Evropske unije Javieru Solani.

Nakon objavljivanja Odluke, visoki predstavnik dao je slijedeću izjavu:

"Danas objavljujem odluku koju sam donio nakon dugotrajnog razmišljanja i nakon konsultacija sa mojim kolegama iz Upravnog odbora Vijeća za implementaciju mira.

To je jedna od najtežih odluka koju sam morao donijeti za vrijeme moga mandata u ovoj zemlji, jer, kao što svako zna, i kao što sam i rekao na njegovoj dženazi u oktobru 2003. godine, izuzetno cijenim Aliju Izetbegovića, kojeg sam smatrao prijateljem i kojeg sam priznao kao oca njegovog naroda i kao hrabrog i sposobnog lidera svoje zemlje.

Kao što vam je poznato, nekoliko ključnih ambasadora danas su

već izrazili svoju duboku zabrinutost nedavnom odlukom o preimenovanju glavnog međunarodnog aerodroma Bosne i Hercegovine, aerodroma koji opslužuje njen glavni grada. Danas poslijepodne sam razgovarao sa ambasadorima, i danas sam odlučio da donesem tešku, ali neophodnu odluku o suspendovanju odluke o preimenovanju Međunarodnog aerodroma Sarajevo.

Odluka o preimenovanju Međunarodnog aerodroma Sarajevo , u multietničkoj zemlji kakva je Bosna i Hercegovina koja je prošla kroz tragičan rat, neće doprinijeti procesu pomirenja, već će ga ugroziti.

Neće doprinijeti ugledu Sarajeva kao bosanskohercegovačke prijestolnice, već će ga umanjiti; neće pomoći komercijalnom razvoju prvog aerodroma u BiH, već će mu nanijeti štetu.

Ako je međunarodni karakter Bosne i Hercegovine neosporan, njeni međunarodni aerodromi moraju dobiti imena na način koji osigurava njihovu neospornost u zemlji u cjelosti i uz pristanak sva tri konstitutivna naroda i Ostalih. Naši međunarodni aerodromi su međunarodno lice zemlje, što znači da njihovi nazivi moraju odražavati osnovni konsenzus na kojem je BiH, jedinstveno, utemeljena.

Ako želimo izgraditi multietničku Bosnu i Hercegovinu koja je, kako mi je sam Alija Izetbegović rekao, bila njegov san, onda moramo priznati da je isuviše rano za donošenje ovakvih odluka. Nadam se i vjerujem da će jednoga dana biti pravi trenutak za donošenje ovakve odluke – ali to vrijeme još uvijek nije došlo.

Glavni aerodrom u zemlji, posebno kada opslužuje glavni grad, ima jedinstven i poseban značaj. Građani Bosne i Hercegovine, bez obzira na njihovu nacionalnost i na to gdje u BiH žive, imaju pravo da slete u svoj glavni grad, na aerodrom koji simbolizira konsenzus, zbog kojeg će biti ponosni i sretni što su došli kući.

Prvobitno sam smatrao da je ovu odluku najbolje ostaviti

domaćim organima vlasti. Ali domaće vlasti su u potpunosti ignorisale savjet koji je došao sa najvišeg nivoa da još jednom razmotre potencijalno štetnu odluku, a sada se bojim da bi posljedice mogle narušiti neometano funkcionisanje BiH institucija.

Iz ovih razloga, danas sam odlučio da suspendujem odluku o preimenovanju Međunarodnog aerodroma Sarajevo .

U narednih deset dana najaviću novu proceduru koja će osigurati da svi međunarodni aerodromi u Bosni i Hercegovini mogu biti preimenovani na transparentan način, uz istinske konsultacije i uz odobrenje nadležnih institucija na državnom nivou, što uključuje i predstavnike svih konstitutivnih naroda širom Bosne i Hercegovine.

Ne mogu završiti ovu izjavu prije nego što najsnažnije osudim pismo koje je danas poslijepodne član Predsjedništva BiH Borislav Paravac uputio visokom predstavniku i generalnom sekretaru dr. Solani. Ovo pismo dr. Solani je uvredljivo, sporno i apsolutno neprikladno. Nadam se da će predsjednik Paravac razmisliti i povući svoje pismo.

Kao što sam već rekao o Aliji Izetbegoviću na njegovoj dženazi 22. oktobra 2003. godine, "mnogima nije predodređeno da ostvare ovakva postignuća u jednom životnom vijeku. Niti je predodređeno bilo kojem običnom čovjeku."

Moje mišljenje o Aliji Izetbegoviću nije se ni najmanje promijenilo od tada. Međutim, moja je obaveza da vodim računa o interesima Bosne i Hercegovine u cjelosti, uključujući one institucije koje definiraju njen međunarodni karakter, kada je očigledno da političke strukture ove zemlje nisu uspjele u tome.

Svjestan sam da će ova odluka biti veoma nepopularna među nekima i nedobrodošla među mnogima. Ali ovo činim u interesu svih građana ove zemlje i u čvrstom uvjerenju da je to ispravan postupak."